

31 JUL 2002
LID-Media/I
PUSAT MEDIA GLOBAL 2002 SIBUK DENGAN AKTIVITI

Oleh: S. Retna

LANGKAWI, 31 Julai (Bernama) -- Pusat media bagi Dialog Antarabangsa Perkongsian Pintar Global 2002 (Global 2002) dipenuhi dengan aktiviti hari ini, sehari sebelum dialog berkenaan berlangsung dengan kira-kira 450 peserta daripada 36 negara akan mengambil bahagian.

Global 2002, yang diadakan di Pelangi Beach Resort, Pantai Chenang di sini, merangkumi Dialog Antarabangsa Langkawi (LID), Dialog Antarabangsa Selatan Afrika (SAID) dan Dialog Antarabangsa Timur Afrika (EAID).

Sekretariat media, yang membuka pintunya kepada para wartawan pada Isnin bagi pendaftaran mereka yang membuat liputan acara berkenaan, menyaksikan lebih 240 wartawan, jurugambar dan anggota-anggota krew televisyen asing dan tempatan mendaftar sehingga kini.

Koordinator sekretariat media, Aniceta Ferns berkata ramai wartawan hadir untuk membuat liputan acara berkenaan tetapi pusat media itu telah siap sedia sepenuhnya untuk menerima kedatangan mereka termasuk di saat-saat akhir.

"Kami bersedia membantu mana-mana pemberita atau jurugambar yang datang pada saat-saat akhir. Jabatan Perdana Menteri, yang mengeluarkan kad akreditasi, juga telah dimaklumkan mengenai hal ini dan telah bersetuju untuk memberi ruang kepada yang lambat tiba," kata beliau.

Pusat Media itu agak sibuk hari ini dengan para wartawan datang beramai-ramai mengambil pas media, kit media serta buletin 20 mukasurat yang dikenali sebagai "Smart links" yang diterbitkan oleh agensi berita nasional, Bernama, bagi dialog tersebut.

"Semuanya berjalan lancar tanpa sebarang masalah," kata Ferns.

Pusat berkenaan mempunyai 25 komputer dengan kemudahan Internet yang membolehkan para wartawan mengakses pelbagai laman web utama bagi Global 2002 serta menghantar berita mereka melalui e-mel.

Pusat itu juga menempatkan operasi Bernama, agensi berita rasmi bagi Global 2002, yang menyediakan berita melalui saluran teks dan audio-visual.

Berita-berita mengenai Global 2002 boleh diakses melalui laman web Bernama di www.bernama.com, yang turut menghubungkan laman web Kumpulan Industri-Kerajaan Malaysia bagi Teknologi Tinggi (MiGHT), penganjur bersama bagi dialog itu.

Bagi makanan dan minuman, Pelangi Beach Resort telah menyediakan kopi dan teh serta snek di pusat media itu.

"Esok kami akan memberi taklimat kepada jurugambar dan jurukamera bagi menjelaskan perkara yang boleh dan tidak boleh dilakukan semasa membuat liputan acara itu kerana kami mahu memastikan ia berjalan dengan lancar," kata Ferns.

Global 2002 akan dibuka secara rasmi oleh Perdana Menteri Datuk Seri Dr Mahathir Mohamad malam esok di Pusat Pameran Antarabangsa Mahsuri.

Ferns berkata media akan dikemaskinikan mengenai dialog berkenaan dua kali sehari dalam masa tiga hari ia berlangsung, sekali pada waktu sebelum makan tengah hari dan akhir setiap hari persidangan. -- BERNAMA

SR SHY NHD